



RUOTTI OON TULLU KYLMÄKSI. LÄMPIMÄMMÄN POLITIIKAN TULEMISEN VUORO.

Ruotti oon fantastinen maa. Täälä monet ihmiset oon lykästynheet totteuthaan unelmansa. Met olema ottanheet tehtäväksi tulevaisueen uhmat. Mutta viimisiempien vuosien aikana Ruottista oon tullu kylmempi. Kuilut ja rasismi oon saahneet kasuta. Vaimon- ja miehenpuolisten ekonoomiset eelytysten erot oon lissäintynheet. Poliitiikka oon ollu ottamatta vasthuuta ihmisistä ja miljööstä.. Met tiämä, ette maa joka antaa ylön olla fantastinen kaikile kohta ei ole fantastinen kelheen. Sen takia oon tullu inhimilisemän ja lämpimämmän poliitiikan vuoro – oon tullu uuen hallituksen vuoro.

Klimattuutokset oon meän aijan suuriin uhma. Ko mailman johtajat kokkoin-tuvva klimpattihiippukokkousheen Parishiin tesämperissä 2015 Ruotti häätyy osottaa semmosten päätösten maholisuuksia, jotka vähentävvä meän päästöjä kestäville tasoile. Ruotti pittää olla muterni ja inspiroiva eeläkulkeva maa. Mailmala ei ole varraa klimattipoliitiikkaan, jossa maat eeläkulkemisen sijasta kylmästi oottava toisten myötätuloa. Poliitiikka hääty lämmetä. Ei klimatti.

Ruotti tarttee uusia työpaikkoja, mutta Aliansin työlinja ei ole vähentänny työtömyyttä. Sen siihaan elämästä oon tullu ekstra tyhviä ja kylmää niile, jotka menettävvä työnsä elikkä sairastuvva. Met halvama investeerata klimattityöhön – aijoissa lähtevhiin junhiin, kaupunkilähiöitten remonthiin ja uushiin enersiitehokhaishiin asunthoin. Vuona 2018 usseimilla ihmisillä pittää olla työpaikka, johonka mennä ja nuorila maholisuuat löytää tiet opiskelhuin ja töihin. Tätä oon inhimilisempi ja lämpimämpi poliitiikka.

Kaikki koululaiset pitävä mennä ilola kouhluun. Monet pitävä palavasti haluta opettajanammattia ja kaikin kouluissa työtätekevät pitävä saa'a tillaa oman ammatin ossaamiselle ja luovuuelle. Ei piä olla hyviä ja huonoja kouluja – kaikki koulut pitävä ola hyviä. Vuona 2018 monta kertaa useampi valittee opiskelun opettajaksi, opettajat saava aikaa ammatille ja koululaiset saava tukea aijoissa. Kylmää pyrokraatiita ja voitonhalua lisäävvää poliitiikkaa vasthaan met asetamma lämpimän poliitiikan, joka sallii lissää työka-veria ja lissää aikaa jorkhaiselle koululaisele. Sallikaa lasten saa'a opettajansa takasi.

Met olema vakkuutettuja siittä, ette semmonen Ruotti oon maholinen, jossa meän yhtheinen tulevaisuus meät yhistä, pikemin ko se mistä met olema poijessa, minkä näkösiä met olema, mitä met uskoma, mikä meän sukupuoli oon, minkä ikäsiä met olema elikkä minkänäkönen meän pere oon. Kaheksan vuotta Aliansin jälkhiin oon uuen hallituksen ja lämpimämmän poliitiikan aika koittanu.

Sie saatat itte paneutua vaaliliikheesheen täälä: volontar.mp.se ja sie saatat tulla jäseneksi täälä: mp.se/bli-medlem

Tervetula!

”Klimattikysymys koskee sitä mailmaa, jonka met halvama jättää jälkhiin meän lapsile ja lastenlapsile. Hopusti häätyy vähentää päästöjä, mutta sen met klaaraama. Oon kysymys älykhäämän enersiin käyttämisestä, muternista juna- ja kolektiivitrafikista ja osta-ja-viskaa-yhtheiskunnan estämisestä. Met saatama tehä Ruottista kokomailmalisen esikuwan, joka ottaa vasthuun ja näyttää tietä.”

Åsa Romson

Met halvama:

- ette Ruotti ottaa johtopaikan siinä kansainvälisessä työssä, jonka päämäärä oon jättää pareman mailman meän lapsile
- tehä miljööstävälisen valinan ainan helpomaksi ja halvemaksi. Juna pittää olla halvempi ko lento ja kulkea hopumasti ko piili
- Investeerata uushiin klimattityöpaikhoin – juna ja pyssi, uusiutuva enersii, remonteerata miljoonaprukrammin asunot, ekotyrisimi, kierätys ja vintaasi.

”Poika, poika joka istuu taaimpanna luokassa jo ylösantanheena – se tarttee opettajan, jolla oon aikaa ja uskaa juuri hänheen. Ja tyär, joka ripustaa koko ittetuntonsa ja tulevaisuuensa siihen, ette saapi korkeimat pistheet, korkeiman petykin – koulu häätyy sen kloorata, ette näkkee hänet pruuvien, petykien ja tulosten takana. Kaikila koululaisila häätyy olla oikeus ilola mennä kouhluun!”

Gustav Fridolin

Met halvama:

- ette useampi halvaa alkaa opettajaksi. Opettajia pittää värteerata meän tärkeimiksi ammattilaisiksi. Siksi valtion rahoja pittää käyttää opettajien palkkojen nostamisheen
- ette opettajat saava aikaa olla opettajia. Met piämä vähentää pyrokratiita ja palkata lissää väkeä kouhluun
- ette koululaiset triivastuvva koulussa. Häätyy olla koululaisten terhveyenhoithoon parempia saantia ja enämpi kulttuurua koulussa.

Lue lissää meän politiikasta meän vaalimanifestissä elikkä täälä: mp.se

14. septämperiä sie saatat olla myötä muterniseeraamassa Ruottia.